



BOSANSKOPETROVAČKI VJESNIK

Mjesečnik Općine Bosanski Petrovac

Glas Načelnika

PRETRES!



Dragi sugrađani,

Svakog čuda – tri dana, kažu!

Tako i „pretresa“: došli inspektori MUP-a, 30. marta, i izvršili pretres u radnim prostorijama naše Općine! Uradili to po uobičajenoj proceduri, po nalogu kantonalnog Tužiteljstva i Općinskog suda u Bihaću.

Inspektori svakodnevno vrše brojne pretrese, po Zakonu o Kantonalnom tužilaštvu USK. S ciljem, kako piše u Zakonu: „Tužilaštvo štiti ostvarivanje ljudskih prava i građanskih sloboda koje garantira Ustav Bosne i Hercegovine, Ustav Federacije Bosne i Hercegovine i Ustav Kantona, kao i ostvarivanje prava i interesa pravnih lica utvrđenih zakonom, te osigurava ustavnost i zakonitost.“

Po slovu i u duhu Zakona, inspektori u našoj Općini dva dana radili svoj posao, zaposlenici svoj – niko nikome nije smetao. Inspektori izuzeli dokumente, za koje su smatrali da će biti dokazi za potvrdu opravdanosti naloga Tužiteljstva i Suda, i – čekamo rezultat.

Ako nešto nismo radili po zakonu, Načelnik je najveći krivac. Je li, nije li – vidjet ćemo iz inspektorskog nalaza. Možda i sudskog procesa, bude li potrebe.

Ovaj uvodnik nije mjesto na kojem ću komentarisati nalog za pretres, još manje se braniti. Neću se ni hvaliti. Jesu li radovi i rezultati

koji se ostvaruju širom općine za pohvalu ili za pokudu, to najbolje znate vi za koje se sve to radi, vi dragi sugrađani, vi koji ste mi povjerali četvorogodišnju dužnost najodgovornijeg čovjeka našeg grada!

Prilika je da vam podnesem kraći izvještaj o najnovijim radovima i ostvarenjima, što je smisao ovog uvodnika...

Grad je, po prvi put, dobio funkcionalnu kanalizacionu mrežu: neće više fekalije zagađivati naše ulice! Za to je trebalo prokopati čak 16-ak kilometara ulica, sa brojnim preprekama podzemne komunalne mreže, pa zatrpali i alfaltirati. Značajnijeg posla nije bilo za naš grad u posljednje četiri decenije, kada je iz Sanice dovedena pitka voda! Po asfaltiranju, nastalo slijeganje tla, pojavile se tzv. dilatacije i depresije, uobičajene posljedice ovakvih radova. Šahtovi tonuli za koji centimetar (previše, i za pješake, kamo li za vozila), izvođač radova sve popravio o svom trošku. I o tome je bilo „ekspertnih“ komentara, jedno tri dana...

Evo još jednog podatka komunalne prirode: kada sam stupio na današnju časnu dužnost, ljeta 2012. godine, u našoj općini svijetlila je 551 javna sijalica – danas ih je 1.507! Te, 2012. godine, u našim selima žmirkala je pokoja sijalica samo u Krnjeuši u Bukovači (plaćali ih mještani iz svog džepa); danas Kolunić osvjetljavaju 83 sijalice, Vrtoče 59, Bravsko 53, Smoljanu 45, Vođenicu 35... Danas u našim selima imamo tek nešto manje sijalica (514), nego ih je bilo u gradu prije 30-ak mjeseci.

Ne bi to Načelnik mogao uraditi bez dobrih saradnika, kako u Općinskom vijeću tako i u svim službama. Da je tako, primjer je i najnovija „Informacija o stanju upravnog rješavanja u općinama USK“, koju je usvojila kantonalna Vlada 11. marta: među osam općina USK, naše upravne službe najbrže rješavaju zahtjeve građana!

Neću detaljisati o teškim i dugim pravnim sporovima oko našeg najvećeg bogatstva, šuma, sporovima (sa Državom!) koje smo dobili! Ne spominjem Arifagića farmu, Bingo, Industrijsku zonu, nova radna mjesta... Ne spominjem ni milione maraka u donacijama, koje nam omogućavaju rješavanje komunalnih problema, izgradnju kuća i stanova za raseljene, razvoj poljoprivrede... Valja donacije zaslužiti, ne padaju s neba.

...Toliko, da više ne pretresam naše ulice i sela, da ne pretresam ono što građani vide i žive!

Općinski načelnik Zlatko Hujčić

Petrovčani mogu biti zadovoljni uslugama javne uprave

NAJULJUDNIJA ADMINISTRACIJA U USK!

Prema „Informaciji o stanju upravnog rješavanja u općinama USK“, koju je usvojila kantonalna Vlada 11. marta, potom u cijelosti prihvatila Skupština – bosanskopetrovački organi javne uprave ostvarili su najbolje rezultate u rješavanju zahtjeva koje su podnijeli naši sugrađani u 2015. godini!

Prema podacima iz Informacije, u našoj Općini podneseno je 10.300 upravnih predmeta, od kojih je u zakonskom roku riješeno 9.096 (92%), a 768 (8%) nakon isteka zakonskog roka. Procenat riješenih predmeta u odnosu na 2014. godinu povećan je čak za 7%. Iz tabelarnog pregleda se vidi da su naše općinske službe u 2015. riješile 96 % upravnih predmeta,

Poređenja radi, u Cazinu je podneseno 11.873 predmeta: 6.350 (79%) riješeno je u zakonskom roku, a 1.666 (21%) izvan propisanog roka. U Bihaću je bilo 8.128 predmeta, od kojih je 89% riješeno u zakonskom roku, a 11% izvan roka. Sudeći po podacima iz Informacije, naša općinska uprava bila je najuspješnija među osam općina USK!

Nije čudno što je najmanje predstavljeni u Kantonu bilo je upravo na rad naše općinske uprave, kako se navodi u „Izvjestažu o radu kantonalne upravne inspekcije za 2015. godinu“.

Pohvalan je i „Izvjestaj Ministarstva pravde o provođenju Zakona o državnim službenicima i namještenicima u organima državne službe USK“ – u našoj se Općini u potpunosti primjenjuju sve odredbe ovog Zakona, pratećih uredbi i pravilnika.

Zaposleni u Općini, koji su rijetko kada odsutni sa radnog mjesta, zadovoljni su neočekivanim ali zasluženim priznanjima, koja ih dodatno potiču da još predanije budu na usluzi svojim sugrađanima.

Tabelarni prikaz procentualno riješenih upravnih predmeta u Gradu Bihaću i općinama na području USK-a u 2015. godini

Red. br.	Naziv jedinstvenog gradskog / općinskog organa uprave	Procent riješenih upravnih predmeta u 2015. godini
1.	Grad Bihać	85%
2.	Općina Bosanska Krupa	81%
3.	Općina Bužim	91%
4.	Općina Bosanski Petrovac	96%
5.	Općina Cazin	68%
6.	Općina Ključ	85%
7.	Općina Sanski Most	82%
8.	Općina Velika Kladuša	86%

38. redovna sjednica
Općinskog vijeća

BOGATA I PLODOTVORNA RASPRAVA

Na 38. redovnoj sjednici Općinskog vijeća, održanoj 31. marta, većinom glasova, nakon konstruktivne rasprave, usvojeni su Izvještaj o radu Organa i službi uprave, Odluka o Konsolidovanom godišnjem izvještaju Budžeta Općine za proteklu godinu i Informacija o utrošku tekuće rezerve Budžeta za 2015. godinu. Vijećnici nisu prihvatili Odluku o imenovanju predsjednika Općinske izborne komisije.

Najviše rasprave izazvao je zaključak Vijeća od 25. februara, vezan za Projekt kanalizacione mreže. Odlučeno je da se osnuje nezavisna komisija, sastavljena od stručnih ljudi iz kantonalnih i federalnih organa, komunalnog preduzeća i predstavnika poljoprivrede, radi detaljnog pregleda završenih radova na projektu kanalizacije. S tim u vezi, zadužen je Općinski pravobranilac da izvrši uvid u ugovore vezano za ovu problematiku. Usvojen je i Plan ljetnog održavanja puteva. Usvojen je Nacrt izmjena i dopuna općinskog Urbanističkog plana 2007-2027, koji je upućen u javnu raspravu.

Vijećnici su u nastavku razmatrali izvještaje o radu javnih ustanova i javnih preduzeća za 2015. godine, čiji je osnivač Općinsko vijeće. Također, razmatrani su i planovi i programi rada za 2016. godinu. Usvojen je Izvještaj o radu i poslovanju JP „Veterinarska stanica“ za 2015. godinu, Plan i program rada za 2016. godinu. Kao i Plan aktivnosti Sportskog saveza za 2016. godinu.

Usvojen je i izvještaj i plan preduzeća Komunalno d.o. o. i Centra za socijalni rad. Vijeće nije prihvatilo Izvještaj o radu Centra za kulturu i obrazovanje za 2015. godine, ali je usvojilo Plan i program rada za 2016. godinu. Vijeće je imenovalo Azru Balić i Elmu Terzić na do sada nepopunjena mjesta članova Upravnog i Nadzornog odbor Centra za kulturu i obrazovanje.

Prihvaćena je i Informacija o stanju u poljoprivredi i stočarstvu, kao i Plan proljetne sjetve. Ove godine proljetnom sjetvom biće obuhvaćeno 585 hektara poljoprivrednog zemljišta.

Donesena je Odluka, da cijena kvadratnog metra izgrađenog stambenog prostora u državnoj svojini ostane kolika je iznosila i prošlih godina (800 KM). Donesena je i Odluka o izmjeni Odluke o komunalnim naknadama, kojom su umanjene komunalne naknade Domu zdravlja za 50%.

Vijeće je donijelo i Zaključak o prestanku važenja Odluke određivanja naknade za preuzeto građevinsko zemljište u državnoj svojini, budući da je ovo pitanje drukčije riješeno novim Zakonom o stvarnim pravima FBiH. Takođe je usvojena Odluka o uslovima i načinima raspolaganja nekretninama u vlasništvu Općine.

Donesena su i rješenja o utvrđivanju prava vlasništva na građevinskom zemljištu u korist Jasminke Ramić i Šemse Ferizovića.

Zahtjev za otpis duga za Komunalno i smanjenje koeficijenta za obračun komunalnih naknada vraćen je na očitovanje Općinskom pravobranilaštvu i Službi za finansije, te će biti razmatrano na narednoj sjednici Općinskog vijeća.



Sjednica Općinskog vijeća

NORVEŽANI POSJETILI ARIFAGIĆA FARMU

Delegacija sastavljena od 40 norveških farmera, koju je predvodila g-đa Anne Vigete Lilloe, ambasadorica Norveške u BiH, posjetila je, početkom aprila, farmu Arifagić Investment u Kozarcu, gdje je održana i plodotvorna poslovna konferencija, da bi potom došli i u naš grad...

Došli su na dugo i široko Medeno polje, na njegovu najzapadniju parcelu, zvanu Bjelajsko polje, podno Oraškog brda, na kojem raste farma za 300 junica norveškog porijekla... Uzgajaće se u idealnim, medenim higijensko-zdravstvenim uslovima, kao u kakvom modernom turističkom resortu, sa „kravljim hotelom od mnoštva zvjezdica“ na vedrom petrovačkom nebu!

Jedinstvene u svijetu, poznate pod imenom „norveške krave“, nastale su kao rezultat naučnih eksperimenata, križanjem sedam vrsta autohtonih krava. Tako dobijene, ove krave su za nekih 150 kg lakše, a žive duže od ostalih krava, daju više mlijeka boljeg kvaliteta, lako se tele...

Kozarca, skrasio se u Norveškoj, gdje je postao ugledan farmer, radeći sa „norveškim kravama“. Vrativši se u domovinu – on se ne osvrće unazad, nego gleda naprijed, u budućnost! On nastoji da doprinese da se u ovoj zemlji bolje živi!“ – kaže ambasadorica Vigete Lilloe.

Po dolasku na Medeno polje, gosti su svratili u etno-selo „Čardaklije“, gdje ih je načelnik Zlatko Hujic upoznao sa poljoprivrednim i stočarskim potencijalom Općine. „Na našem prostoru postoji 31.269 ha poljoprivrednog zemljišta, državnog i privatnog, bogatog pašnjacima, livadama, čistim zrakom i

vedrim nebom. Tu su i kvalitetne šume.“

Sve to nadomak jedne jedine Une, u zaleđu Nacionalnog parka. Ovako očuvano prirodno bogatstvo, na izuzetno povoljnom geoprometnom pravcu osnovnih koridora Zapadna Evropa-Mediteran-Bliski istok, sve više privlači investitore...

Najbolje to potvrđuje ugledna firma „Arifagić Investment“ podizanjem farme i planiranjem novih investicija i zapošljavanja, na najzapadnijem dijelu Petrovačkog polja, dugog od Laništa do Lipe, od padina širokog Grmeča do podno Klekovače i Osječenice.



Skup u Kozarcu (Saračević, Arifagić, Hujic)

„Jusuf je tokom rata bio protjeran iz svog

Razgovor sa Sandijem Terzićem,
direktorom tvornice „Pirnar doo“

PROŠIRENJE PROIZVODNJE I NOVA ZAPOŠLJAVANJA...

„Pirnar doo“ je preduzeće koje u našem gradu posluje od 2010. godine, kao proizvođač aluminijskih vrata. Izrađuje ih po evropskim, dakle najzahtjevnijim kriterijima. Da u potpunosti zadovoljava te kriterije vidi se po tome što kompletna proizvodnja ide u izvoz... u zemlje Evropske unije!

Kako drukčiji nego ugodan razgovor imali smo koncem prošlog mjeseca sa gospodinom Sandijem Terzićem, direktorom tvornice „Pirnar doo“...

„Bavimo se isključivo proizvodnjom aluminijskih ulaznih vrata; kroz takva, u proizvodne hale „Pirnara“ – površine od nekih pet hiljada kvadratnih metara – svaki dan uđe gotovo 60 zaposlenika, koji svojim kvalitetnim radom u ovoj tvornici hrane svoje porodice! To su mladi i vrijedni radnici, koji nas svojim vrijednostima ohrabruju, da i naravno radimo na tome da se taj broj konstantno povećava“, počeo je priču g. Terzić, reklo bi se pun ponosa.

Obavljati direktorske poslove ovako jedne uspješne i jake firme podrazumijeva i susrete sa velikim brojem izazova.

„Nije jednostavno! Svaki posao ima svoje izazove, ali uz



Fabrika Pirnar u Koluniću

dobru organizaciju i ekipu koju smo formirali – mi smo zadovoljni! Na takvom temelju planiramo proširenje firme, što znači i zapošljavanje novih radnika. Danas nam najveći problem predstavlja pronalaženje nove lokacije, zemljišta, novih dobavljača... Vjerujemo da ćemo uskoro sve to staviti na svoje mjesto!“

Ono što ne piše ni u jednom poslovnom izvještaju, ali itekako utiče na iskazane rezultate su međuljudski odnosi i atmosfera u preduzeću.

„Pokušavam da moj odnos sa radnicima bude samo služben, jer timski rad bolje funkcioniše kada se rukovodilac malo odmakne od privatnog života radnika. To nije baš lako, u našoj lokalnoj zajednici u kojoj smo „svi svoji“, u kojoj se međusobno dobro poznajemo! Malo veći problem je pronaći rukovodni kadar, ali stvaraćemo ga, zajedno!“

„Pirnar“ ima odličnu saradnju sa općinskim vlastima. Načelnik Zlatko Hujčić je više puta i obišao proizvodne pogone, i pun je zadovoljstva, što se ovako jedna uspješna firma nalazi upravo u našem gradu: „Mi u Općini moramo podržavati i podržavat ćemo ovakva preduzeća, oni su kičma naše petrovačke privrede! „Pirnar“ je društveno osjećajna i odgovorna firma, koja pomaže zajednicu, kroz donacije, sponzorstva i na druge načine.“

U doba ekonomske krize i privrednih problema u čitavoj zemlji, preduzeće „Pirnar“ pronašlo je načina da se čuje Radio Bosanski Petrovac, koji se vjerovatno ne bi čuo, bez podrške „Pirnara“! Ne izostaje podrška ni međžliisu Islamske zajednice, Sportskom savezu i drugima, a za dolazeće svečano obilježavanje Praznika rada, uključivo promajske ulične trke, glavni sponzor će biti – „Pirnar“!

„Motivacija za ovakve geste dolazi potpuno spontano i neplanirano!“ – skromno kaže uspješni direktor Terzić.

NOVI SPOMENIK JOVANU BIJELIĆU

Jednom od četvorice petrovačkih velikana, umrlom i sahranjenom u Beogradu 1964, njegov rodni grad i njegovi zemljaci koji žive u Beogradu, zamijenili trošno drveno obilježje spomenikom dostojnim imena Jovana Bijelića!

Novo groblje u Beogradu, njegovu naljepšu šetnicu, zvanu Aleja velikana, odnedavno, od 26. marta, krasi jedan novi spomenik – klesarsko umjetničko djelo, dostojno velikog pregaoca umjetnosti Jovana Bijelića! Podigao mu ga je njegov zavičaj, njegovi zemljaci, njegovi Petrovčani!

Do te subote, 26. marta, stajao je tu drveni, „privremeni spomenik“, kako tradicija i pogrebni red nalažu. Ali, to „privremeno“ podugu potraja... Nikako da dođe trenutak da se zamijeni trajnim spomenikom, kako nameću tradicija i poštivanje pokojnika! Potraja to više od pola vijeka, još od godine kada je Jovanova duša napustila ovaj svijet, 1964. godine!?

A, onda, dođe dan kada se beogradski Petrovčani sastaje sa načelnikom Zlatkom Hujčićem, pokazaše mu zapušteni grob našeg velikana Jovana – bi to nedavno, 12. januara – i tu, nad Jovanovim grobom, pade odluka da se grob uredi!

A, onda, dođe dan i – grob bi ureden! Opet se okupili beogradski Petrovčani, sa načelnikom svog i Jovanovog rodnog grada...

„Kako je ova godina i 130. godišnjica rođenja Jovana Bijelića zahvaljujući, općini Bosanski Petrovac i načelniku Hujčiću, vratili smo bar dio duga i ispravili jednu veliku nepravdu prema našem Jovanu Bijeliću!“ – rekao je predsjednik Udruženja Petrovčana u Beogradu, Boro Banjac.

Duško Perić došao iz Diseldorfa, jer se njegovo imanje nalazi u neposrednom susjedstvu Jovana Bijelića. Bijelićeva sestra je često posjećivala kuću Perića, pa je poslije posluženja i kafe, često do kuće, pratio mladi Vladimir Perić.

Koliko je Bijelić bio poštovan u svijetu umjetnosti svjedoče i riječi profesora Dušana Rusalica, predsjednika Udruženja likovnih umetnika Srbije i predsjedavajućeg Koordinacionog odbora svih reprezentativnih udruženja u Srbiji:

„Jovan Bijelić je svima nama profesor i onima koji će doći i oni koji su bili, ovo je jedan tužan trenutak, zato što tek sad obilježavamo na pravi način Jovana Bijelića, a u isto vrijeme i zadovoljstvo je što smo ovdje ponovo sa njim i on ponovo s nama. Izražavam veliku zahvalnost načelniku opštine Bosanski Petrovac, i mislim da ćemo ostvariti i dalju saradnju na zajedničkim programima gdje je riječ o podsjećanju na život i rad Jovana Bijelića i na sve ono što nam je ostavio u amanet.“

Svoje zadovoljstvo iskazao je i načelnik Hujčić:

„Predstavljam sve građane Bosanskog Petrovca i danas je moje srce puno! Ovim činom ispravili smo propuste čitavog niza generacija Petrovčana, a među njima je bilo vrlo uticajnih ljudi, i političara, koji su mogli mnogo ranije ovo da urade. Zato smo i na grobu ostavili godinu da se zna da se velikom slikaru Jovanu Bijeliću svjetskog kalibra odužila baš ova generacija njegovih Petrovčana!“

Prisutnima se obratila i Milica Kecman, direktorica Centra za kulturu i obrazovanje:

(nastavak na narednoj stranici)



Spomenik Jovanu Bijeliću

(nastavak sa prethodne stranice)

„Ove godine ćemo sanirati i Jovanovu kuću, u Reveniku. A dosadašnje, trošno drveno spomen-obilježje postat će dio postavke u Spomen-muzeju „Jovan Bijelić“ u našem gradu. Prilika je spomenuti da su u našem gradu rođena još tri velikana svjetskog glasa: slikar Mersad Berber i pisci Ahmet Hromadžić i Skender Kulenović! Nije daleko dan kada ćemo podići spomenik našoj četvorici velikana!“

Među prisutnima bio je i direktor Predstavništva Republike Srpske u Beogradu Mladen Cicović, zatim Miroslav Latinović, šef kabineta Predsjednika Srbije Tomislava Nikolića, članovi Upravnog odbora Udruženja Petrovčana u Beogradu i brojni Beograđani.

Prilika je podsjetiti na život i djelo Jovana Bijelića, rođenog u Reveniku, podno Osječnice, 19. juna 1886. godine, umrolog u Beogradu 12. marta 1964; evo šta piše Wikipedia:

„Studirao je u Sarajevu kod J. K. Janevskog, a zatim u Krakovu 1909-1913. kod T. Aksentovića, L. Vičulovskog i J. Pankijevića. Boravio je u Parizu 1913/14. i u Pragu 1915. Od 1919. je živio u Beogradu, gdje je bio scenograf, a potom i šef slikarske radionice Narodnog pozorišta.

Najviše je slikao portrete, pejzaže, mrtvu prirodu i kompozicije. Prošao je kroz nekoliko faza u kojima je izražen uticaj kubizma u skulptorskoj koncepciji čvrsto modelovane forme i škrtosti palete, a potom je pod uticajem fovizma stvarao koloritna djela izuzetne sočnosti i čulne ekspresije. U posljednjoj fazi, rastvarao je predmete uznemirenim potezima boje. Bavio se i pedagoškim radom, imao je privatnu školu iz koje je izašao niz slikara.

Jedan je od osnivača i pripadnik slikarskih grupa „Oblik“, „Samostalni“ i „Nezavisni“. Redovni član Srpske akademije nauka i umetnosti bio je od 1963.

Prvu samostalnu izložbu imao je 1917. u Sarajevu, a drugu 1919. u Zagrebu. Učestvovao je na mnogim kolektivnim izložbama. Samostalne izložbe imao je i u Beogradu (1929, 1932, 1957, 1968), Ljubljani (1959) i Bihaću (1960). Njegova djela nalaze se u više muzeja i galerija: Muzej savremene umetnosti i Narodni muzej u Beogradu (38 dela), u Spomen zbirci Pavla Beljanskog u Novom Sadu itd. Dobitnik je velikog broja slikarskih nagrada.

Neka od njegovih najpoznatijih djela su: „Portret djevojke“, „Kupačica“, „Jajce“, „Kći umjetnikova“, „Dvorište“, „Ženski akt“, „Sarajevo“, „Portret starice“, „Djevojčica s lutkom“ (1928), „Dječak jaše lava“ (1929), „Apstraktni predio“ (1920).



Staro, drveno obilježje spomenika Jovana Bijelića

POČELA REALIZACIJA REGIONALNOG STAMBENOG PROGRAMA

Na teritoriji Općine je u toku sprovođenje projekta obnove u okviru Regionalnog stambenog programa na osnovu javnih poziva iz 2013. godine koji su objavili Ministarstvo za ljudska prava i izbjeglice BiH, Federalno ministarstvo raseljenih osoba i izbjeglica i Ministarstvo za izbjeglice i raseljena lica Republike Srpske.

Projekt se sastoji od dva potprojekta:

Pomoć u rekonstrukciji po principu „ključ u ruke“

U okviru ovog potprojekta predviđena su sredstva za dodjelu građevinskog materijala za 20 domaćinstava i pomoć u rekonstrukciji po principu „ključ u ruke“ za 150 domaćinstava u BiH. Ukupna vrijednost potprojekta je 2.316.000 eura, od toga 2.035.000 eura su donatorska sredstva, dok je učešće BiH 281.000 eura.

U sklopu ovog potprojekta počela je, 23. marta, obnova objekata za 8 porodica, dva u Rašinovcu i po jedan u Brestovcu, Gradu, Jasenovcu, Koluniću, Krnjoj Jeli i Risovcu.

Federalno ministarstvo raseljenih osoba i izbjeglica uvelo je izvođača i nadzor u ovaj projekat. Izvođač radova je „Zidart“ iz Mrkonjić Grada, a rok za završenje je 90 dana.

Izgradnja stanova za višeporodično stanovanje za lokalnu integraciju izbjeglica i interno raseljenih lica u BiH

Ovim programom predviđena je izgradnja 438 stanova u objektima za višeporodično stanovanje, za što je odobreno ukupno 14.035.189 eura, od čega 12.007.777 eura donatorskih sredstava, a 2.027.412 eura je učešće BiH.

U našem gradu je u toku izrada projektne dokumentacije za stambenu zgradu sa 20 stanova, za što se pribavljaju potrebne dozvola i provjera potencijalnih korisnika.

Zainteresovani građani treba da se jave u Službu za stambeno-komunalne djelatnosti, koja se nalazi na prvom spratu u zgradi Općine, soba broj 10 (telefon: 037 883 596).

Sve više javne rasvjete

OSVIJETLJEN GRAD, OSVIJETLJENA SELA

Vidljivo je na svakom koraku da su i grad i sela sve bolje osvijetljena, za što se iz općinskog budžeta ulažu značajna sredstva. Zahvaljujući tome, broj mjernih, razvodnih mjesta, sa kojih se mogu u okolinu razvoditi sijalična mjesta, danas iznosi 44, a u 2012. ih je bilo tri puta manje (15). U toku je otvaranje još 5 mjernih mjesta.

U seoskim mjesnim zajednicama nije bilo mjernih mjesta, čak ni javne rasvjete; samo su mještani Krnjeuše i Bukovače imali pokoju sijalicu, a sami su plaćali troškove rasvjete. Predsjednik MZ Bukovača ističe da je dio sredstava iz općinskog budžeta utrošen i na javnu rasvjetu u Bari (12 sijalica), u Gagićima (8) i u Ševama (4).

Umjesto 551 sijalice u 2012. danas gradske ulice osvijetljavaju 933 sijalice, dok ih je 514 u selima.

Što se tiče sredstava općinskog budžeta koja se godišnje ulažu u javnu rasvjetu, ona su iznosila 91.653,46 KM u 2015., a 42.696,82 KM u 2012. godini.

SIJALIČNA MJESTA (GRAD)

Mjerno mjesto	Broj sijalica	
	2012.	2016.
Ploča	68	80
Novo naselje	28	46
Pekiska ulica	32	41
Hujića ulica	34	48
Pošta	17	22
Ibrahimpasića ulica	50	74
Bolnica	-	50
Trgovačka ulica	25	58
Skenderovo naselje	23	50
Gaj	38	78
Didovići	42	60
Biščani I	60	72
Biščani II	39	52
Dževar	45	86
Omladinska ulica	50	61
Bursaći	-	10
Industrijska zona Gorinčani	-	45
UKUPNO:	551	933

SIJALIČNA MJESTA (MJESNE ZAJEDNICE)

Mjesna zajednica	Broj sijalica
Rašinovac	83
Bjelaj	29
Smoljana	45
Bravsko	53
Vođenica	35
Krnjeuša	30
Kapljuh	12
Kolunić	83
Suvaja	16
Bukovača	69
Vrtoče	59
UKUPNO	514

Slušajte Radio Bosanski Petrovac od 15:00-17:00, svakim danom na 90.9 MHz fm

UREĐUJE SE SAOBRAĆAJNICA U GORINČANIMA

Saobraćajna infrastruktura u Poslovnoj zoni Gorinčani biće uskoro uređena na način koji će u potpunosti zadovoljiti visoke kriterije koji zahtijeva poslovni svijet. O tome je načelnik Zlatko Hujčić, 6. aprila, potpisao govor sa preduzećem Mrkonjićputevi, kao tenderski utvrđenim najpovoljnijim izvođačem radova. Ugovor obuhvata izgradnju saobraćajnice unutar Poslovne zone u dužini od 225 metara.

Sredstva u iznosu od 100 hiljadu KM osigurana su u sklopu „Grant sheme Unapređenje poduzetničkih zona u Federaciji BiH“, kao zajedničke inicijative Federalnog ministarstva razvoja, poduzetništva i obrta, Razvojnog programa Ujedinjenih nacija (UNDP) u BiH i Vlade Švicarske.

Cilj projekta je osigurati i unaprijediti potpunu funkcionalnu infrastrukturu u Poslovnoj zoni Gorinčani i podići njenu atraktivnost za nove ulagače u svrhu ekonomskog rasta i zapošljavanja na lokalnom nivou. Općina Bosanski Petrovac sufinansira ovaj projekat sa 25 hiljada KM.

Radovi u Gorinčanima treba da budu završeni za 60 dana, računajući od dana uvođenja izvođača u posao.

Projekt PRO-Budućnost

ZA JAČANJE POVJERENJA MEĐU GRAĐANIMA

Na sastanku načelnika Zlatka Hujčića sa Maidom Behrem-Stojanov, direktoricom „Projekta PRO-Budućnost“, održanom u zgradi Općine 29. marta, dogovoreno je da se i naša Općina uključi u ovaj Projekt, čiji je osnovni cilj onova i izgradnja povjerenja među građanima BiH. Nosilac Projekta je CRS (Catholic Relief Services; doslovno prevedeno: Katoličke dobrotvorne usluge), američka humanitarna organizacija čije aktivnosti u potpunosti finansira USAID (Američka agencija za međunarodni razvoj).

Na sastanku je formirana tročlana grupa, koja će raditi na provođenju Projekta u našem gradu, koji se već provodi u 30 općina iz svih dijelova BiH.

U organizacijskom obliku, aktivnosti se provode u formalnim i neformalnim grupama mladih, žena, vjerskih skupina, manjinskih povratnika, udruženja žrtava, vijeća škola, roditelja... Priređuju se tzv. „javna govorenja“, okrugli stolovi, razni kulturni događaji. Mladi će imati priliku da sudjeluju u mirovnim kampovima, konferencijama i drugim obrazovnim aktivnostima.

Troškove svih aktivnosti snosi CRS.

500 KM ZA NOVOROĐENČAD!

Na Dan žena, 8. marta, načelnik Zlatko Hujčić donio je odluku koja je obradovala sve porodilje, a i očeve: za svako novorođeno djetete Općina će dodijeliti jednokratnu pomoć od 500 KM! To je jedna od mjera koje bi trebalo da doprinesu povećanju nataliteta u našoj općini.

U današnje doba gotovo da i nema mladih porodica sa četvero-petero djece, dok su do unazad par decenija pravu rijetkost predstavljale porodice sa manje od tog broja djece.

Merisa Selman je jedna od sretnih majki koja je ove godine dobila peto dijete. Presretna je zbog prinove, ali i neočekivanog novčanog poklona! Ona i njezina porodica žive, tačnije rečeno životare, u Reveniku, podno Osječenice, u teškim uslovima – bez stalnog zaposlenja, rade povremene poslove, na dnevnicu...

„Mnogo mi znači ova pomoć! Pomogla mi je da nabavim stvari za bebu, koje ne znam kako bih drukčije osigurala. Zaista smo u teškoj situaciji... Troje djece ide u školu, četvrto bi trebalo poći za koji mjesec. Svaka

pomoć je dobro došla!“ – kaže Merisa.

Bosanski Petrovac je prvih mjeseci godine postao bogatiji za još jednu bebu, a majka Azra Gredelj: „Zahvaljujem se načelniku, gospodinu Zlatku Hujčiću, što nam je omogućio ta sredstva i Centru za socijalni rad.“

Općina će za ove naknade obezbijediti 15-ak hiljada KM za ovu godinu, budući da je u ove svrhe Centar za socijalni rad imao 30-ak ovakvih zahtjeva prošle godine.



Porodica Selman

Zapis o plemenitom udruženju žena...

“Fatma” radi na jačanju uloge majke u društvu

U našem gradu je u septembru 2015. održana osnivačka skupština Asocijacije „Fatma“, koja je činom osnivanja postala članicom istoimene asocijacije koja djeluje u BiH pune dvije decenije. Kao udruženje žena, „Fatma“ se isključivo brine o poboljšanju uloge žene u društvu.

„Bavimo se isključivo porodicom, tj. potrebama porodice, pa u tom cilju organiziramo i obrazovna predavanja i tečajeve za žene“, kaže gospođa Amna Džigum, predsjednica Asocijacije u našem gradu. „Brinemo, naravno, i o djeci – o djeci šehida, poginulih boraca, djeci povratnika, sa jasnom vizijom o neodvojivosti odgoja od obrazovanja, kako bi djeca stasala u stručnjake visokih moralnih kvaliteta.“

Program obrazovanja žena-majki najviše je usmjeren na odgoj djeteta, s ciljem da dijete stekne općeljudske vrijednosti, da bude sposobno

za život u multikulturnoj i multietničkoj Bosni i Hercegovini, da bude zaista zdrav, aktivan i koristan član zajednice!

„Naša Asocijacija poseban značaj daje svakoj djevojci, ženi, majci, kroz razna predavanja. Nastojimo da one steknu što išii stepen naobrazbe, da su im dostupna sva radna mjesta koja neće povrijediti njihovu ženstvenost, da se uključuju u političke aktivnosti... To nije stvar prestiža, to je naša obaveza, da kada postanemo majke – da ispred svih obaveza bude odgoj njihove djece!“, naglašava predsjednica Džigum. „Jedno od predavanja bilo je posvećeno osteoporozu, jednom smo priredile promociju knjige poezije „Topline“ Nine Halilbašić, prije nekoliko dana imale smo i Donatorsko veče sa bogatim kulturno-zabavnim programom, a sav prihod namijenjen je za humanitarne svrhe.“

Uskoro ćemo organizirati obuku osnovnog krojenja i šivanja, početni kurs će biti besplatan.“, objašnjava predsjednica i nastavlja:

„Program Asocijacije obuhvata i uspostavljanje mostova prijateljstva između saradnica i članica, pa je program osmišljen tako da bi žene što više slobodnog vremena provele zajedno, razmjenjivale iskustva, zajednički rješavale probleme vezane za odgoj i porodicu. Željela bih zahvaliti svojim stalnim članicama, ali i ostalim simpatizerima Asocijacije koje se nesebično daju kakva god aktivnost je u pitanju.“

Radni prostor Asocijacije nalazi se u nekadašnjim prostorijama Radija Bosanski Petrovac.



Članice udruženja u Domu kulture

Takmičarska provjera stečenog znanja osnovaca i srednjoškolaca

Tokom marta provedena su takmičenja u OŠ „Ahmet Hromadžić“ iz predmeta Bosanski jezik i književnost. U konkurenciji učenika V razreda prvo mjesto je osvojio Edis Gutlić, a u IX razredu najbolja je bila Esmā Jaganjac. Njih dvoje će predstavljati svoju školu na kantonalnom takmičenju, koje će se održati 19. aprila upravo u njihovoj školi.

„Očekuje nas velik, odgovoran posao na organizaciji ovog takmičenja. Nije lako dočekati oko 70 učenika i 50 nastavnika iz Kantona. Odmah želim naglasiti, da nam je iz općinskog budžeta dodijeljena namjenska pomoć od 1.000 KM, čime nam je znatno olakšan rad na organizaciji kantonalnog takmičenja koje je od velikog značaja za našu Općinu“ – kaže Mujesira Kavaz, direktorica škole „Ahmet Hromadžić“.

Na kantonalnom takmičenju iz matematike, školu će predstavljati, također, najbolji učenici po razredima: V razred – Tarik Gutlić, Nikolina Kerkez za VI razred, Nedžma Jaganjac za VII, Adan Zukančić za VIII i Benjamina Hidić za IX razred.

Fizika: Sabina Hujić – VIII razred i Esmā Jaganjac IX razred.

Hemija: takmičenje iz održat će se 3. maja u Bužimu, a Esmā Jaganjac će predstavljati svoju školu i u ovom predmetu.

Biologija: Erna Velagić najbolja u VIII razredu.

Informatika: Tarik Družić je najbolji iz među učenicima IX razreda, tako da će on biti predstavnik OŠ „Ahmet Hromadžić“ na takmičenju u Cazinu, 14. aprila.

Njemački jezik: najbolja je Marija Čulibrk, IX razred.

Engleski jezik: Vladimir Novaković je najbolji u VII razredu, a Anida Kahrić u VIII razredu. Među učenicima IX razreda prvo mjesto je osvojio Emir Brković, a drugo Ivana Grbić, pa su oboje predstavljali školu na kantonalnim takmičenjima koja su održana u Bihaću (18. marta) i Velikoj Kladuši (25. marta).

Na kantonalnim takmičenjima učenika IX razreda, u Bužimu i Bihaću, najbolji plasman, drugo mjesto u hemiji, ostvarila je Esmā Jaganjac, dok je Marija Čulibrk bila treća iz njemačkog jezika.

Na školskom takmičenju iz predmeta Biologija, za učenike VIII razreda prvo mjesto je osvojila Erna Velagić. Ova učenica je učestvovala na kantonalnom takmičenju u Sanici.

Održano je takmičenje i u MSŠ „Bosanski Petrovac“, a na kantonalnom takmičenju plasirali su se sljedeći učenici:

Bosanski/hrvatski/srpski jezik i književnost: Danijela Pećanac i Marina Tešić, učenice III razreda.

Njemački jezik: Snežana Čulibrk i Nejra Hamzić.

Matematika: Isnam Jukić i Elma Samardžić.

Informatika: Isnam Jukić

Ekipe Civitasa na kantonalnom takmičenju koje se održalo u Bužimu 6.4.2016. učenici su osvojili 4. mjesto.

Na kraju, svi učenici su pokazali solidne rezultate, a najbolji rezultati su postignuti iz predmeta Fizika, učenik Isnam Jukić je osvojio 3. mjesto, i iz predmeta Biologija, učenica Mrđa Nataša je osvojila 3. mjesto, Mašić Mujo- 5. mjesto i Ramić Ajša- 7. mjesto.

Rezultati sa ostalih takmičenja se očekuju, a imena takmičara će biti objavljena u narednom broju našeg mjesečnika.

Načelnik Zlatko Hujić je i ove godine pomogao MSŠ „Bosanski Petrovac“ novčanim iznosom od 500 KM. „Od 500 KM koje nam je donirao načelnik Zlatko Hujić dio sredstava smo odvojili za finansiranje odlaska učenika na kantonalna takmičenja, a preostali dio finansiranje odlaska na državno takmičenje srednjih stručnih škola koje će se ove godine održavati u Živinicama“, ističe direktorica MSŠ „Bosanski Petrovac, Besima Kišljen.

“ŽELJA MI JE DA STUDIRAM U SVOJOJ ZEMLJI!”

Petrovčani su zaista ponosni na Ahmeta, Jovana, Mersada i Skendera. Ni manjeg mjesta, ni više umjetnika svjetskog kalibra! Naš grad je odnedavno ponosan i na jednu mladu umjetnicu, umjetnicu u matematici, našu genijalku Adisu Bolić.

Adisa Bolić je rođena 1998. godine, i u rodnom je gradu završila osnovnu školu, a odnedavno pohađa „Sarajevo koledž“.

Zlato na Evropskom matematičkom kupu... Bronza na Balkanskoj matematičkoj olimpijadi... Pohvala na svjetskom takmičenju najboljih matematičara... Ovo su samo neki od Adisinih uspjeha.

Matematika je nauka koja je, kažu, mrska mnogim učenicima. Ali, Adisa je od nje napravila umjetnost. „Matematiku sam zavoljela još od malih nogu. Takmičiti sam se počela u osnovnoj školi, i to nastavljam... U srednjoj školi se mnogo više bavim matematikom, pa sam je sada još više zavoljela.“

Adisa pristupa podjednako odgovorno i znatiželjno svim oblastima u matematici ali, ipak, za nijansu joj je draže područje kombinatorike. „Kombinatorika mi je najdraža, jer je puna logičkih zadataka, do čijih se rješenja dolazi mnoštvom kombinacija, što je i zanimljivo i zabavno.“

Možda matematiku mnogi ne vole, ali život kakav imamo danas ne bi bio moguć bez matematike. „Bez matematike sigurno ne bismo imali dosta stvari koje danas imamo, a njen takmičarski dio kojim se ja bavim najviše pomaže u razvijanju logike i načina razmišljanja, što će mi mnogo pomoći na fakultetu, a i u životu općenito.“

Adisa je pohađala „Unsko-Sanski koledž“ u Bihaću, a odnedavno pohađa „Sarajevo koledž“, i tu je naišla na iskrenu dobrodošlicu i razumijevanje svih profesora i kolega. „Od ove godine idem u školu u Sarajevu, i već sam se obikla. Na početku je bilo teško odvojiti se od društva i sredine, ali vremenom postaje lakše. Profesori imaju razumijevanja, čak mi popuštaju u svojim predmetima, kako bi mi pomogli da se posvetim matematici, što mi zaista mnogo znači, ali me i obavezuje da ih ne izneverim!“

Bliži se Evropska matematička olimpijada za djevojke, koja se održava u Rumuniji od 10. do 16. aprila. Adisa se priprema za ovo takmičenje, u kojem se Bosna i Hercegovina pojavljuje prvi put. Adisa ima dobre prognoze: „Podugo se pripremamo, sada i ubrzano, jer uskoro krećemo. Mislim da možemo zauzeti dobar plasman. Moj lični cilj jeste da osvojim zlatnu medalju! Za takmičenja me pripremaju moja dva profesora, Admir Beširević i Harun Hindija. Bez njih ne bih uspjela koliko jesam, jako sam im zahvalna.“

Međutim, pored svih svojih obaveza, priprema, Adisu ne zaobilaze ni problemi ekonomske prirode, jer država ne pokazuje spremnosti da pomogne mladim genijalcima.

„Svake godine se javljaju problemi oko finansija za odlazak na olimpijade, pa tako i ove godine. Istina je da nam do skoro nisu bila uplaćena sredstva, ali za mene sada jesu.“

Unatoč izostanku pomoći „sa vrha“ države, meni nije izostalo i razumijevanja, ali sa nivoa „niže vlasti“: meni je moja Općina više puta pomogla! „Zahvaljujući najviše punom razumijevanju i zalaganju načelnika Zlatka, Općina mi je prošle godine omogućila odlazak na Svjetsku olimpijadu, a ove godine i za dolazeću, Evropsku matematičku olimpijadu za djevojke. Načelniku i njegovim saradnicima se i ovim putem duboko zahvaljujem!“

Pored toga što Adisa uživa u rješavanju teških matematičkih zadataka, ona nalazi vremena za svoju porodicu i prijatelje. Planira se i u budućnosti baviti matematikom. „Planiram studirati matematiku, ali šta tačno i gdje još nisam sigurna. Ostavljam tu brigu za sljedeću godinu. Za sada mi je želja da ostanem u BiH i da ovje studiram. Ali, možda se to i promijeni. Jako volim matematiku i mislim da mi neće nikada dosaditi te da ću se njome baviti cijelog života.“



Adisa sa Načelnikom

UPOZORENJE GRAĐANIMA NA OPASNOST OD IZBIJANJA POŽARA NA OTVORENOM PROSTORU

Budući da su već započeli radovi na čišćenju poljoprivrednih i drugih površina, te spaljivanja korova, suhe trave i ostalog niskog rastinja, a imajući u vidu da su u prethodnim godinama evidentirani brojni požari na otvorenim prostorima, prvenstveno šumama i poljoprivrednim površinama (radi se o požarima suhe trave i rastinja na poljoprivrednim površinama – bilo obrađenim, bilo zapuštenim), koji su izazivali velike materijalne štete, **upozoravamo građane da je zabranjeno bilo kakvo loženje vatre u blizini šumskih površina ili površina pod usjevima, stambenih naselja, vodova dalekovoda, u blizini putnih komunikacija i sl.**

Posebno podsjećamo građane na sljedeće:

- Da su lica koja su izvršila spaljivanje korova ili loženja vatre na otvorenom prostoru dužna mjesto spaljivanja pregledati i ostatke u potpunosti pogasiti,
- Da je zabranjeno spaljivanje korova i loženje vatre na otvorenom prostoru za vrijeme vjetrova i noću,
- Ako se spaljivanje obavlja u prisutnosti više vlasnika odnosno korisnika zemljišta koji organizovano vrše spaljivanje na većoj poljoprivrednoj površini, dužni su o tome obavijestiti vatrogasce.

U slučaju nekontrolisanog širenja vatre, potrebno je ODMAH o tome obavijestiti vatrogasce na

telefon broj 123, operativni centar civilne zaštite na telefon 121 ili policiju na telefon broj 122.

Napomena građanima

Ako usljed spaljivanja nastane požar koji bi imao posljedice veću materijalnu štetu ili opasnost za ljudske živote, za to su u skladu sa Krivičnim zakonom Federacije Bosne i Hercegovine predviđene sankcije- kazne zatvora i novčane kazne.

Apelujemo na sve građane, poljoprivrednike i šumske radnike:

Pridržavajte se zakonskih odredbi, ne palite vatru na nedozvoljenim mjestima, ne ostavljajte upaljenu vatru bez nadzora, ne uništavajte prirodu i okoliš, jer Vaša mala nepažnja može imati velike posljedice!

Od sporta do sporta...

Proljeće ispunjeno aktivnostima

Uveliko se vrše pripreme Sportskog saveza i Udruženja pedagoga Bosanski Petrovac, vezano za aktivnosti oko realizacije projekta tradicionalne Prvomajske ulične trke.

Istovremeno, u toku su kantonalna sportska

takmičenja na nivou osnovnih i srednjih škola, pod pokroviteljstvom kantonalnog Sportskog saveza i Udruženja pedagoga. „OŠ „Ahmet Hromadžić“ i MSŠ „Bosanski Petrovac“ uzet će učešća u svim sportovima“, kaže Armin Mahmutspahić, predsjednik Sportskog saveza Općine.

Što se tiče nogometa, „Mladost“ je igrala protiv „Bajera“ iz Velagića. Porazena je, ali je „gol utjehe“ dao mladi Mirnes Hukić, te još jednom potvrdio da je zaslužen ponio titulu

najboljeg petrovačkog sportiste u 2015.

Mladi odbojkaši i odbojkašice odmjerili su snage sa vršnjacima iz Bosanske Krupe: odbojkaši su pobijedili „Krušnicu“ 3:0, a mlađe kadetkinje pobijedile ŽOK „Una“ 2:0 (25:7 i 25:16), u okviru IX kola Kantonalne ženske odbojkaške lige.

Košarkaši bi trebali početi sa ligom, a tačan kalendar takmičenja biće uskoro određen.



ŽOK „Mladost“, mlađe kadetkinje



OK „Mladost“

Da li znate da naša Općina...

...spada među najprostranije (750 km²) i najviše (665 m/nv) u BiH

...zahvaljujući pogodnoj visini, šumama, livadama, klimi, predstavlja pravu ozonsku banju, pogodnu za zdravstveni i sportski turizam

...ima čak 300 sunčanih dana u godini

...ima bogatu istoriju školstva: prva škola, zvana „Komunalka“, otvorena je 1884. godine

...nema svog predstavnika u Skupštini USK koju čini 30 poslanika iz sedam preostalih općina USK

...ima 22 narodna heroja koji su se borili protiv fašizma u Drugom svjetskom ratu

...je nekad imala avion, na Medenom polju, kao spomenik



AVION KAO SPOMENIK

Avion na našoj slici, iako ispravan, neće više poletjeti. Tu, na betoniranom postolju, uz sami Put AVNOJ-a, stoji odnedavno evocira uspomene. Vraća nas 40 godina unazad i podsjeća na ratne godine kada su sa Medenog polja uzlijetali saveznički avioni prevozeći ranjenike na Siciliju. Sa te petrovačke ravnice, koja je služila kao partizanski aerodrom u vrijeme stvaranja partizanske avijacije, polijetali su avioni i na frontove.

„Daglas“ DC-3 služi sada kao spomen-obilježje koje privlači pažnju brojnih posjetilaca i predstavlja svojevrsnu atrakciju.

P.D.

Petrovački list, broj 1, juli, 1982. godine, 4. str.

Slušajte Radio Bosanski Petrovac od 15:00-17:00, svakim danom na 90.9 MHz fm